

L I G J
Nr.9112, datë 24.7.2003

**PËR DISA NDRYSHIME DHE SHTESA NË LIGJIN NR.8678, DATË 14.5.2001 "PËR
ORGANIZIMIN DHE FUNKSIONIMIN E MINISTRISË SË DREJTËSISË"**

Në mbështetje të neneve 78, 83 pika 1 dhe 102 pika 4 të Kushtetutës, me propozimin e Këshillit të Ministrave,

K U V E N D I
I REPUBLIKËS SË SHQIPËRISË

V E N D O S I:

Në ligjin nr.8678, datë 14.5.2001 "Për organizimin dhe funksionimin e Ministrisë së Drejtësisë", bëhen këto ndryshime dhe shtesa:

Neni 1

Pika 3 e nenit 4 ndryshohet si më poshtë:

"3. Gjyqtarët dhe prokurorët mund të shërbejnë si këshilltarë ligjorë dhe në nivele drejtuese ose ekzekutive të strukturave juridiko-profesionale të Ministrisë së Drejtësisë.".

Neni 2

1. Në nenin 6 bëhen këto ndryshime:

Paragrafi i parë ndryshohet si më poshtë:

"Ministria e Drejtësisë ushtron veprimtarinë e vet në fushat".

2. Pika 6 ndryshohet si më poshtë:

"6. Ndjek dhe realizon politikat dhe veprimtaritë, që lidhen me çështjet e përjasjes dhe të integritetit të sistemit të drejtësisë në nismat dhe strukturat ndërkombëtare përkatëse, si dhe bashkërendon punën me institucionet e tjera, në funksion të përafrimit të legjislacionit shqiptar me atë të Komunitetit Europian dhe të shteteve anëtare të tij.".

3. Pika 7 ndryshohet si më poshtë:

"7. Kujdeset për organizimin dhe funksionimin e shërbimeve, që lidhen me sistemin gjyqësor dhe atë të drejtësisë, në përgjithësi.".

4. Pika 8 ndryshohet si më poshtë:

"8. Kujdeset dhe kontrollon veprimtarinë e administratës gjyqësore.".

5. Pika 17 ndryshohet si më poshtë:

"17. Kujdeset, drejton dhe kontrollon, sipas ligjit, shërbimet juridiko-administrative, që kanë lidhje ose realizohen në sistemin e drejtësisë.".

6. Pika 18 ndryshohet si më poshtë:

"18. Kujdeset dhe mbështet, sipas ligjit, ushtrimin, organizimin dhe funksionimin e profesionit të avokatit, noterit, arbitrit, ndërmjetësit, administratorit të falimentimit dhe profesioneve të tjera të lira, të lidhura me sistemin e drejtësisë.".

7. Pika 20 ndryshohet si më poshtë:

"20. Kujdeset për realizimin dhe bashkërendimin e veprimtarive në fushën e drejtësisë për të miturit, për mbrojtjen e të drejtave dhe të interesave të ligjshëm të tyre, edukimin ligjor dhe parandalimin e shkeljeve të ligjit nga ana e tyre, si dhe për ushtrimin e shërbimeve ndaj të miturve, nga strukturat përkatëse të sistemit të drejtësisë.".

Neni 3

Në nenin 10 bëhen këto ndryshime dhe shtesa:

1. Pika 1 ndryshohet si më poshtë:

"1. Drejtoria e Përgjithshme e Kodifikimit ushtron funksione dhe detyra që lidhen me fushat e

veprimtarisë së Ministrisë së Drejtësisë, të parashikuara në nenin 6 pikat 2, 3, 4, 5, 6, 16, 17, 20, 22, 24, 26, 27, 29 dhe 30 të këtij ligji. Për realizimin e funksioneve të saj, sipas fushave përkatëse, krijohen dhe funksionojnë drejtoritë vijuese:

- a) Drejtoria e Legjislacionit dhe e Asistencës Ligjore;
- b) Drejtoria e Integritit dhe e Zhvillimit të Marrëdhënieve Ndërkombëtare;
- c) Drejtoria e Drejtësisë për të Miturit dhe e Shërbimeve Juridiko-Administrative."

2. Pika 3 ndryshohet si më poshtë:

"3. Drejtoria e Integritit dhe e Zhvillimit të Marrëdhënieve Ndërkombëtare ushtron këto veprimtari:

a) përgatit, ndjek dhe bashkërendon punët për realizimin e politikave, të programeve dhe raportimeve për integrimin e sistemit të drejtësisë në nismat dhe strukturat ndërkombëtare përkatëse, si dhe për zhvillimin e marrëdhënieve ndërkombëtare në fushën e drejtësisë;

b) kujdeset dhe bashkërendon punën me institucione të tjera për realizimin e përafrimit të legjislacionit shqiptar me atë të Komunitetit European dhe të shteteve anëtare të tij për fushën e drejtësisë;

c) përgatit materiale dhe studime krahasuese për zhvillimet në fushën e së drejtës ndërkombëtare dhe në atë të së drejtës shqiptare;

ç) ndjek dhe realizon procesin e studimit, të negociimit, nënshkrimit, miratimit dhe zbatimit të marrëveshjeve ndërkombëtare, që i përkasin fushës së kompetencës të Ministrit të Drejtësisë;

d) kujdeset për zhvillimin e marrëdhënieve ndërkombëtare dhe të kontakteve të Ministrisë së Drejtësisë me institucionet ndërkombëtare, institucionet homologe të shteteve të tjera, autoritetet gjyqësore të huaja, si dhe organizatat e tjera publike ose private të huaja;

dh) kujdeset dhe merr masa për organizimin, pjesëmarrjen dhe realizimin e shërbimeve të nevojshme për veprimtaritë ndërkombëtare në fushën e drejtësisë, brenda ose jashtë shtetit."

3. Pas pikës 3 shtohet pika 4 me këtë përmbajtje:

"4. Drejtoria e Drejtësisë për të Miturit dhe e Shërbimeve Juridiko-Administrative ushtron këto veprimtari:

a) përgatit, ndjek dhe bashkërendon realizimin e politikave, të programeve dhe veprimtarive që lidhen me fushën e drejtësisë për të miturit, edukimin ligjor, luftën dhe parandalimin e shkeljeve të ligjit dhe kriminalitetit të të miturit;

b) kujdeset dhe bashkërendon punën me institucionet e ngarkuara me detyra ligjore për realizimin dhe mbrojtjen e të drejtave dhe të interesave të ligjshëm të të miturve në fushën e drejtësisë, veçanërisht lidhur me birësimet dhe kujdestarinë e tyre;

c) kujdeset për zhvillimin dhe zbatimin e legjislacionit, që ngarkon Ministria e Drejtësisë dhe, në tërësi, organet e drejtësisë, me përmbushjen e shërbimeve të ndryshme juridiko-administrative."

Neni 4

Në nenin 11 bëhen këto ndryshime:

1. Paragrafi i parë i pikës 1 ndryshohet si më poshtë:

"Drejtoria e Përgjithshme e Çështjeve të Drejtësisë ushtron funksione dhe detyra që lidhen me fushat e veprimtarisë së Ministrisë së Drejtësisë, të parashikuara në nenin 6, pikat 7,8, 9, 10, 11, 15, 18, 19, 21, 25, 28 dhe 30 të këtij ligji. Për realizimin e funksioneve, sipas fushave përkatëse, krijohen dhe funksionojnë drejtoritë vijuese."

2. Pika 4 ndryshohet si më poshtë:

"4. Drejtoria e Profesioneve të Lira ushtron këto veprimtari:

a) ndjek dhe mbështet, sipas ligjit, ushtrimin e profesionit të avokatit, të noterit, arbitrit, ndërmjetësit, administratorit të falimentimit dhe profesioneve të tjera të lira, të lidhura me sistemin e drejtësisë, si dhe organizimin dhe funksionimin e këtyre profesioneve;

b) kujdeset dhe mbështet funksionimin e veprimtarisë dhe të shërbimeve të ekspertimeve ligjore, si dhe ndjek çështje të tjera, në përputhje me dispozitat përkatëse të akteve ligjore, që rregullojnë veprimtarinë e tyre;

c) kujdeset për grumbullimin, përpunimin dhe ruajtjen e skedave dhe të regjistrit të gjendjes gjyqësore, si dhe për lëshimin e dëshmive përkatëse, në bazë të këtij regjistri."

Neni 5

Në nenin 12 bëhen këto ndryshime:

1. Titulli i nenit ndryshohet si më poshtë:

"Drejtoria e Bashkëpunimit Gjyqësor Ndërkombëtar".

2. Shkronja "a" ndryshohet si më poshtë:

"a) realizon dhe ndjek marrëdhëniet e Ministrisë së Drejtësisë me organet e sistemit të drejtësisë, në funksion të përmbushjes së detyrimeve që rrjedhin nga instrumentet e bashkëpunimit gjyqësor ndërkombëtar."

3. Paragrafi i fundit ndryshohet si më poshtë:

"Ministri i Drejtësisë dhe Ministri i Financave caktojnë kriteret dhe rregullat për përzgjedhjen e përkthyesve të jashtëm, tarifat e shpërblimit të tyre, si dhe rastet e tarifave të shërbimit të përkthimit zyrtar që duhet të paguajnë të tretët, sipas shkronjave "c", "ç" dhe "d" të pikës 1 të këtij neni."

Neni 6

Neni 13 ndryshohet si më poshtë:

"Neni 13

Drejtoria e Kontrollit Ekonomiko-Financiar

Drejtoria e Kontrollit Ekonomiko-Financiar ushtron veprimtaritë e mëposhtme:

a) realizon kontrollin ekonomiko-financiar të strukturave të Ministrisë së Drejtësisë dhe të institucioneve në varësi të saj;

b) rekomandon masa ligjore dhe institucionale për përmirësimin e gjendjes dhe të praktikave, ekonomike dhe financiare, të veprimtarisë së Ministrisë së Drejtësisë dhe institucioneve në varësi të saj;

c) ushtron kontrolle në veprimtarinë e strukturave të administratës gjyqësore për përmbushjen e detyrimeve ligjore, për të cilat ligji ngarkon me përgjegjësi Ministrinë e Drejtësisë;

ç) propozon, sipas ligjit, marrjen e masave disiplinore ndaj personave përgjegjës për shkeljen e dispozitave ligjore, që lidhen me disiplinën ekonomiko-financiare;

d) bashkërendon veprimtarinë e saj me strukturat e tjera të specializuara të ekzekutivit në fushën e kontrollit të brendshëm administrativ dhe ekonomiko-financiar."

Neni 7

Shkronja "ë" e nenit 14 shfuqizohet.

Neni 8

Neni 15 ndryshohet si më poshtë:

"Neni 15

Drejtoria Ekonomike

Drejtoria Ekonomike ushtron veprimtaritë e mëposhtme:

a) ndjek dhe bashkërendon veprimtaritë e studimit dhe të përmbushjes së procedurave për hartimin e kërkesave buxhetore të Ministrisë së Drejtësisë dhe të institucioneve në varësi të saj;

b) merr masa, ndjek dhe raporton, sipas ligjit, për planifikimin, sigurimin dhe zbatimin e buxhetit të miratuar, për realizimin e fondeve financiare dhe të investimeve në fushat e veprimtarisë së Ministrisë së Drejtësisë dhe të institucioneve në varësi të saj."

Neni 9

Pas nenit 18 shtohet neni 18/1 me këtë përmbajtje:

“Neni 18/1

Komiteti Shqiptar i Birësimeve

Komiteti Shqiptar i Birësimeve është institucion në varësi të Ministrisë së Drejtësisë, i cili, sipas ligjit, ndjek dhe realizon organizimin dhe funksionimin e veprimtarive që lidhen me birësimet, për interesin e ligjshëm në mbrojtje të të drejtave të të miturve.”.

Neni 10

Ky ligj hyn në fuqi 15 ditë pas botimit në Fletoren Zyrtare.

**Shpallur me dekret nr.3938, datë 19.8.2003 të Presidentit të Republikës së Shqipërisë,
Alfred Moisiu**